

Das Schloß in der Sünfte

Fürere rachd lange Zeid, unne im Dool woor de Grund rachd sumpfich unn fäüchd, dou schdonna ouwe in de „Sünfte“ e Schlouß. Es schdonna ouffem Schdääköübbel unn drömmrömm en glänne See middere Zuchbrügge. Die Dürfer auserömm woann danne Schloßherrinne zinspflichtich. Ach Ouwesinn. Die Herrinne woann drei Jungfern. Die hadde e Laawe in Saus un Braus, huann sich Liebhaber genomme wiesen good gebassd hoad, e lasderhafdes sündiches Lawe hald. In de Dürfer die Mönsche muassde Hunger leid unn darb.

Eijdz woar emoal wieder e schlachd Joar gewasd. Im Frühjoar hadds schbead nouchemoal Frousd gawe unn en Hauffe Blüde sänn defruann. Im Summer hoadds dann on äänere Dour geräänd. Wos die Bauer von de Egger rogehollt huann woor nijed die Reijd waad. In de Dürfer ömms Schlouß huann die Mönsche unn es Vieh nur nouch Hunger geliede.

Also sänn die Bauer, Wewer, Doochlüäner, Ald unn Jung zum Schlouß komme, gehoffd ouff wos zum Esse. Dou schdonnese dann römm, bleich unn ausgemircheld. Gezidderd huannse für Hunger. Außem Schlouß hoadd mer die Mussig hör schbiele. Wiese gedanzd, gejuweld unn gefeierd homm.

Unn dann is die verdurwene Gesellschafd raus ouffen Balkon. Gelachd huannse unn ijen Schboud haddese on de Noad un damm Elend von de Mönsche dou unne ömmen See. Diener huann dann Kürb vool Bröäder gebrochd. Die Jungfern unn ihr Freier huann es Broad genomme unn no ins Wasser gewurfe. Gelachd huannse un geruffe: “Fangd es Broad. Wann ihr Hunger hobbd, dann fand es Broad auf. Laffd äfoch üwer es Wasser! “Üwer daar Frevel schdonne die hungerede Mönsche schdarr für Endsedze. Sie huann zumüässdgugg wie ä Broad nochem annern im Wasser unnergange is.

Unn dou, isse aus em Waald komme. Kääner hadds richdich gesijen, öwer ouff ämoal worsche dou. E alde Fraa midd ormseälische Glääder om Leib. E Baadelweib. Kääner hoaddse gekannd. De Mönsche schdoggd de Oadem wie dos Weib äfoch üwer es Wasser löffd, die Bröäder auffenggd un ons Ufer zu danne Hungernde würfd. Die kannde gornijed begreif, wosse dou grad erlawe. Un wie dos Baadelweib es ganze Broad gereidd hadd unn sich die Mönsche de gröübsde Hunger geschdilld hadde, heijbdse ihr Henn drohend zum Schlouß, die Lumbe falle vin ihr, sie schwebd üwer em See in überirdischer Herrlichkeit. Unn dou huannse die Mönsche erkannt. Es woor die Himmelskönichin. Die sündiche Jungfern, die wu dos Goddesgeschengg Broad sou furchdbor geschändt hadde, woann schdeif für Endsedze. Gleichzeitich wüädds düster, Donner grollt unn die Aarde fengd o zu bebe. Für Schregge renne die Läuü in Waald un veschdeggele sich hinneschd de Beeme. Unn die mudiche, die wu zurüüggeguggd huann kannde geseh, wie dos Schlouß im See unnergange iss. Es Wasser hoadd geschäümd unn gegurcheld unn nooch e boor Aachebliigg wor dar Schbugg vebei. Wu vürher e Schlouß schdonna, wor nur nouch de See. Unn häüd nouch, wann mer on damm See schdeahd unn luurd, kann mersche gehör, wiese feiern unn lache gaanz dijef unne.